

Siunnersuut uunga: Inatsisartut Suleriaasiata allanngortinneqarnera**Saqqummiussissut**

(Inatsisartut Siulittaasuut)

Siullermeerneqarnera

Siulittaasoqarfik sinnerlugu Inatsisartut Suleriaasiata allanngortinneqarnissaanut siunnersuut matumuuna saqqummiutissavara.

Siunnersuummi ilaatigut pineqarput Inatsisartut isumaqatigiinniarnerni Naalakkersuisut Siulittaasuata oqaaseqarsinnaanerata annertusineqarnera, taamatullu aamma Inatsisartunut ilaasortat najuutinngikkallartarnerat pillugu malittarisassat erseqqissarneqarnerat.

Piffissat oqaaseqarfiusinnaasut atuuttut inatsisissatut siunnersuutit, aalajangiiffigisassatut siunnersuutit aamma apeqquteqaat aallaavigalugu oqallinnissamik siunnersuutit oqaluuserineqarnerini Naalakkersuisunik oqaaseqarsinnaatitaatsippat saqqummiussissutit akissuteqaatillu saqqummiunneqarnerinut, kiisalu naggataarutaasumik oqaaseqaateqarnissamut, taamatullu aamma Inatsisartunut ilaasortanit apeqqutit oqaaseqaatilluunniit akissuteqarfigineqarnerinut atatillugu.

Tamatuma saniatigut Naalakkersuisut Siulittaasuut (Naalakkersuisunullu ilaasortat allat) tunngaviusumik Inatsisartunut ilaasortat allat kikkulluunniit naligalugit oqaaseqartumut siunnersuuteqartumulluunniit apeqquteqarnissaminut oqaaseqaateqarnissaminnulluunniit periarfissaqarput. Piffissalli oqaaseqarfiusinnaasut pillugit malittarisassani partiit ataasiakkaat Naalakkersuisullu apeqqutigisinnaasaat qummut killilerneqarsimapput. Taamaattumik Naalakkersuisut Siulittaasuut oqaaseqartumut siunnersuuteqartumullu apeqquteqarniarpat oqaaseqaateqarniarpalluunniit, tamanna Naalakkersuisunut ilaasortanut tamarmiusunut apeqqutigineqarsinnaasutut killiliussat iluanni pisariaqassaaq.

Inatsisartut 2016-imi ukiakkut ataatsimiinnerminni aalajangiiffigisassatut siunnersuummik akuersissuteqarput, tassuuna Inatsisartut Siulittaasoqarfiat peqquneqarluni Inatsisartut Suleriaasiannut allannguutissatut siunnersuuteqarnissaminut, Naalakkersuisut Siulittaasuata qaqugukkulluunniit oqaaseqarsinnaatitaanissaanik periarfissiisumik.

Suleriaatsip allanngortinneqarnissaanut siunnersuutikkut matumuuna Inatsisartut aalajangerat tamanna ilaannakuusumik naammassineqarpoq. Taamaalilluni siunnersuutikkut Naalakkersuisut Siulittaasuut periarfissinneqarpoq oqaluuserisassani

immikkoortuni ataasiakkaani isumaqatigiinniarnert naggasernissaannut, isumaqatigiinniarnert immikkut taamatut pissutissaqartitsigaangata.

Aalajangiiffigisassatut siunnersuut pillugu isumaliutissiisummini Suleriaatsimut Ataatsimiititaliap Siulittaasoqarfimmut kaammattuutigaa aalajangiiffigisassatut siunnersuutip timitalerneqarnissaanut atatillugu isumaliutigeqqullugu Naalakkersuisut Siulittaasuata oqaaseqarsinnaanissaanik siunnersuut qanoq isumaqatigiinniariaatsimut atuuttumut piffissanullu oqaaseqarfiusinnaasunut atuuttunut naleqqussarneqarsinnaanersoq.

Aaqqiissutissatut Siulittaasoqarfiup siunnersuutaa kaammattuummik tassanga tunngaveqarpoq. Inatsisartut aalajangernerata isumaqatigiinniariaatsimut atuuttumut naapertuuttumik timitalerneqarnissaa pisariaqarsimavoq.

Malittarisassat atuuttut malillugit Inatsisartunut ilaasortaq najuutinnikkallarnissamut akuerineqarsinnaavoq ilaasortap nammineq napparsimaneranut atatillugu, najuutinninnissarluni sivisunerpaamik qaammatisiutit ullui malillugit ullunik 14-inik naatsorsuutigineqarpat. Taamatutaaq ilaasortap najuutinnikkallarnissaa akuerineqarsinnaavoq najuunnissamut aporfissaqarpat, assersuutigalugu timmisartut ilaaffissat aallanngitsoorneri imaluunniit timmisartut aallarfissaasa kinguartinneqarnera tunngavigalugit.

Tamatuma saniatigut najuutinnikkallarnissaa aatsaat akuerineqarsinnaavoq *tamanna Inatsisartunut ilaasortap napparsimaneranut pissutissaqavissumilluunniit akornuserneqarluni najuutinninnerananut assersuunneqarsinnaasumik* Siulittaasoqarfiup naliliinera malillugu pissuteqarpat.

Siulittaasoqarfik isumaqarpoq najuutinnikkallarnissamik qinnuteqarnermi ima pisoqarsinnaasoq itigartitsineq naapertuutinnigsumik aalajangiinertut isigineqarsinnaalluni, oqaasertaliisimanerlu atuuttoq nalornisitsisoq Siulittaasoqarfik taamatut akuersissuteqarsinnaanersoq.

Inatsisartunut ilaasortap ernerme imaluunniit panimi apersortinnerani najuukkusunnini, imaluunniit aapparisaq napparsimavimmi uninnganerata nalaani qitornarisaminnik paarserusunnini tunngavilersuutigalugit najuutinnikkallarnissamik qinnuteqaatit assersuutitut taaneqarsinnaapput.

Taama assingusunilluunniit pisoqartillugu Siulittaasoqarfiup najuutinninnissat ulluinnarni sulinermini akuersissutigisinnaasarpai. Siulittaasoqarfiulli kissaatiginartissimavaa taamatut akuersissuteqartarnermut inatsisitigut tunngavigisat erseqqissarneqarnissaat.

Suleriaatsip allangortinneqarnissaanik siunnersuutikkut matumuuna Siulittaasoqarfik periarfissinneqarpoq najuutinngikkallarnissamut akuersissuteqarnissamut, taamatut qinnuteqarneq *ilaqutariinnermi isiginiagassanik pingaarutilinnik imaluunniit immikkut pissutsinik allanik tunngavilersorneqarsimappat, siulittaasoqarfiullu nalilerpagu qinnuteqaatip itigartinneqarnissaa naapertuutissanngitsoq.*

Taamatut oqaaseqarlunga Inatsisartut Siulittaasoqarfiat sinnerlugu siunnersuut Inatsisartunut oqaluuserisassanngortippara.